

Osnovni zahtjevi koje vertikalna signalizacija treba da ispuni mogu se sagledati ako analiziramo proces kroz koji korisnik prolazi dok je u kontaktu sa porukama koje signalizacija prenosi. Ukratko, korisnik koji prilazi nekom od znakova vertikalne signalizacije trebalo bi, bez smanjenja brzine kretanja, da prepozna informaciju prije no što bude u stanju da pročita njenu poruku, da je zatim shvati i sa povjerenjem prihvati i, najzad, da ima dovoljno vremena da donese odgovarajuću odluku i preduzme akciju prije no što stigne do mjesta na koje se poruka odnosi. Vrijeme koje je vozaču potrebno za svaku od ovih faza zavisi od brojnih subjektivnih i spoljašnjih uticaja, kao na primjer atmosferskih, saobraćajnih ili uslova okruženja, ali i od kvaliteta, načina postavljanja i složenosti poruke svakog znaka posebno.

#### IV - „ČITANJE“ SAOBRAĆAJNE SIGNALIZACIJE

U toku vožnje, kada je jedan od osnovnih elemenata dinamički aspekt doživljavanja signalizacije, ispred vozača je zaštitno staklo na vozilu, koje je istovremeno ograničavajući element percepcije saobraćajne signalizacije. U ukupnom vremenu vožnje, koje se uglavnom sastoji u kontrolisanju putanje kretanja vozila, signalizacija zauzima samo oko 10% ukupne aktivnosti vozača. Zbog toga je vrlo važno da se ostvari kvalitetan kontakt između vozača i poruka koje prenosi signalizacija.

#### V - STANJE NA TERENU

Obilaskom terena i uvidom u postojeću kako vertikalnu tako i horizontalnu signalizaciju, zatečeno je haotično stanje koje je prije svega rezultat neodržavanja iste, a isto tako i rezultat vandalizma i nekulture građana (pisanje po saobraćajnim tablama, odvaljivanje i sl.) te zakonom takvi znakovi postaju nevažeći.

Na osnovu svega uočenog možemo zaključiti da je potrebno uraditi značajne promjene koje će vozačima dati jasniju sliku prilikom kretanja vozilima, a one se prije svega svode na osvježavanje i zamjenu saobraćajne signalizacije prema propisima ZOOBS-a na putevima u BiH. Prema tome, potrebno je postaviti odgovarajuće saobraćajne znakove na odgovarajuća mjesta u zavisnosti od simbola i funkcije kao i odgovarajuću visinu, te postojeće znakove trebamo osvježiti i zamijeniti ukoliko ne zadovoljavaju zakonske odredbe i izvršiti ocrtavanje odgovarajućih oznaka horizontalne signalizacije, kao i osvježavanje postojeće.

Na osnovu svega gore navedenog postići će se poboljšanje sigurnosti i bezbjednosti saobraćaja na lokalnim, nekategorisanim, putevima i ulicama grada Gradačca.

#### VI - MJERE, NOSIOCI I ROKOVI ZA PROVOĐENJE PROGRAMA

U cilju provođenja ovog programa, gradska služba za urbanizam, investicije i komunalne poslove uspostaviti će punu koordinaciju sa JP „Parkinzi“ Gradačac sa kojim sklapa ugovor o realizaciji ovog Programa. Ugovor će sadržavati obim poslova, angažovano ljudstvo i materijalna sredstva, cijenu usluga, vrijeme izvršenja, kontrolu izvršenja i druge elemente.

Služba će sačiniti izvještaj o realizaciji Programa i dostaviti ga Gradonačelniku, a Gradonačelnik će po potrebi dostaviti izvještaj Gradskom vijeću.

Nadzor nad sprovođenjem ovog Programa vršiti će gradska služba za urbanizam, investicije i komunalne poslove putem osobe imenovane od strane pomoćnika Gradonačelnika za nadzor i kontrolu nad izvedenim količinama.

**BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
GRAD GRADAČAC  
- Gradsko vijeće -**

**Broj: 01-04-88/23**

**Datum: 22.03.2023.god.**

**G r a d a č a c**

**PREDSJEDAVALAČ  
GRADSKOG VIJEĆA  
Mustafa H. Adulović, s.r.**

#### 11.

Na osnovu člana 21. tačka 26. Statuta Grada Gradačac („Službeni glasnik Grada Gradačac”, broj 10/22), Gradsko vijeće Grada Gradačac na 23. redovnoj sjednici održanoj 22.03.2023. godine, razmatrajući Prijedlog cjenovnika usluga po Programu izrade i održavanja horizontalne i vertikalne signalizacije na području užeg dijela grada Gradačca za 2023. godinu d o n o s i

#### R J E Š E N J E

#### I

Gradsko vijeće daje saglasnost na Cjenovnik usluga po Programu izrade i održavanja horizontalne i vertikalne signalizacije na području užeg dijela grada Gradačca za 2023. Godinu, broj: 105/23 od 13.03.2023. godine, J.P. “Parkinzi” d.o.o. Gradačac.

**II**

Cjenovnik usluga po Programu održavanja horizontalne i vertikalne signalizacije na području užeg dijela grada Gradačca za 2023. godinu je sastavni dio ovog Rješenja.

**III**

Nakon donošenja ovog Rješenja Grad Gradačac će zaključiti ugovor o obavljanju komunalnih usluga - održavanja horizontalne i vertikalne signalizacije na području Grada Gradačac za 2023.godinu sa J.P."Parkinzi" d.o.o. Gradačac.

**IV**

Ovo Rješenje stupa na snagu osmog dana od dana objavljivanja u „Službenom glasniku Grada Gradačac“.

**BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
GRAD GRADAČAC  
- Gradsko vijeće -**

**Broj: 01-04-89/23  
Datum: 22.03.2023.god.  
G r a d a č a c**

**PREDSJEDAVAJUĆI  
GRADSKOG VIJEĆA  
*Mustafa H.Ađulović,s.r.***

---